

# Top chors vol. 8: Chor viril Surses

■ (rtr) Radiotelevision Svizra Ruman-tscha RTR preschenta il nov ed ultim disc cumpact en la retscha Top chors. El è deditgà al Chor viril Surses. Sut la direcziun da *Luzius Hassler* interpretescha il chor chants lituans d'Antonín Dvořák, ovras da Gion Antoni Derungs e chanzuns sursettras tenor poesias da pader Alexander Lozza. Il Top chors vol. 8 vegn preschentà ils 13-10-2015 a las 19.00 en l'emissiun «Noss chors» dal Radio Rumantsch.

Quest disc cumpact mussa in tagl preschentativ da la lavur dals davos 15 onns dal dirigent Luzius Hassler cun il Chor viril Surses. En l'emprima part sa

deditgescha il chor al ciclus d'Antonín Dvořák «Tschintg chanzuns popularas lituanas per chor viril». Il conchantadur *Mario Jegher* ha procurà per ina translaziun rumantscha fitg precisa. Dal matg flurs cun maioran sur la chanzun dramatica da la matta dal pestgader che ha pers ses frar en las undas da la mar, da la charina persa che vegn tschertgada di e notg en fin tar il pasler ardi e la tschuetta buglian las tschintg chanzuns d'amur da bleras midadas, da surpraisas ritmicas e d'in colorit acustic mirveglius. Da questa musica romantica inamuronta cun in bellezza tun, da la dramatica tentusa e cundida cun bler umor, duessan las audi-

turas ed ils auditurs vegnir plementads en furma multifara.

En il segund bloc sa deditgescha il Chor viril Surses ad ovras da Gion Antoni Derungs. En sia onur ha il chor preparà las duas ovras sacralas, meditative ed impressiunantas per chor viril e saxofon «O salutaris hostia» ed «Ave, maris stella». Questas duas ovras vegnan accumuladas da *Franco Mettler* al saxofon. Ultra da quai pon ins tadlar tschintg chanzuns per chor viril che vegnan dadas fitg darar e che na savessan betg esser adattadas meglier a la chanzun en sia expressivitat musicala. En la davosa part interpretescha il Chor viril Surses chan-

zuns enconuschantas, tuttas cun plects da pader Alexander Lozza. Cun lur profunditad, lur bellezza tonala e lur tipics sentiments rumantschs-romantics èn adattadas, dasper las chanzuns dad Ernst Broechin «Return» e «La baselgia viglia da Lantsch», en spezial er las cumposiziuns da Hans Ludwig Heinrichs «L'oraziun d'ena pelegrina» e «L'orma tgi reiva tar Dia» perfetgamain al chor ed a la stretga patria.

**Pretsch da vendita: 19.50 francs + spediun Infurmaziuns: [www.rtr.ch/butia](http://www.rtr.ch/butia)  
Il disc cumpact Top chors vol. 8 è il davos da questa retscha. L'entira seria dal Top chors vol. 1-8 pon ins retrair tar RTR.**